

224

418

8

準
貴

蓮山先生詩集卷第七

雜言

冬即寄杏花

南州

杏花

杏花

杏花

杏花

杏花



花開色梅的著山家二月春風揚

滿院不聞拍案會談真不覺花

紅透樹空千回才弄曉晴山松

猶疑成雨竹作聲小窗從被紅梅封

雲長閉月不來到字試不存前裏

一枝翠臉青子長相思今年四月

遺山先生詩集卷第七

雜言

癸卯歲杏花

南州景氣暖杏花間紅梅讀書山前二月尾向陽
杏花全未開待開竟不開怕寒貪睡嗔人催愛花
被花惱不徹一日遶樹空千回牙牙嬌語山櫻破
稠爛成團稀作顆小蕾從教絳螭封繁枝未要晴
雲裹兩月不舉酒半歲不作詩更教古銅瓶子無
一枝綠陰青子長相思今年閏年好寒節花開不



妨遲一月

畱船買魚作寒節宋
方舟先生李知幾語

題劉紫微堯民野醉圖

蒼苔濁酒同歌呼白鬚紅頰醉相扶堯時皇質未
全散不論朝野皆歡虞望雲雲非雲就日日非日
先秦迂儒強解事極口譽堯初未識堯民與酒同
一天此外更誰爲帝力仙老曾經甲子年戲將陳
迹畫中傳山川淳朴忽當眼迴望康衢一慨然不
見只今汾水上田翁鞭背出租錢

堯甲子年仙
人張果事

贈荅趙仁甫

仁甫名復雲夢
人江表奇士也

我友高御史愛君曠以真昨朝識君面所見勝所
聞江國辭客多玉骨無泥塵軒昂見野鶴過眼無
鷄羣想君夜醉潯陽時明月對影成三人散著紫
綺裘草裹烏紗巾浩歌魚龍舞水伯不敢嗔何意
醉夢間失脚墮燕秦萬世一旦暮萬里一比隣世
無魯連子黑頭萬蟻徒紛紛君居南海我北海握
手一杯情更親老來詩筆不復神因君兩詩發興
新都門迴望一大笑袖中知有江南春

下黃榆嶺

北厓玄武暮黥黑如積鐵東厓劫火餘絢爛開錦
纈就中嶺頭一峰凸樸奇剝費寒雲幾千疊摩圍
可望不可到青壁無梯猿叫絕林煙日射彩翠新
跬步疑有黃金闕畫工胸次墨汁滿那得冰壺貯
秋月直須潮陽老筆迴萬牛露頂張顛揮醉帖石
門細路無澗泉行人飢渴挽不前辛苦黃榆三十
里豈知却有看山緣

駟豬行

黃臺張氏庄作

洽山蒔苗多費力辦與豪豬作糧食草菴架空尋

丈高擊版搖鈴鬧終夕孤犬無猛噬長箭不暗射
田夫睡中時叫號不似駟豬似稱屈放教田鼠大
於兔任使飛蝗半天黑害田爭合到渠邊可是山
中無橡木長牙短喙食不休過處一抹無禾頭天
明隴畝見狼籍婦子相看空淚流旱乾水溢年年
日會計收成纔什一資身百備粟豆中儋石都能
幾錢直兒童食糜須愛惜此物羣豬口中得縣吏
卽來銷稅籍

嘯臺感遇

襄回五岩上浩歌彌激烈望望蟾房翁倒影乍明
滅地古足靈異祠廢餘像設子規夜啼山竹裂老
鶴亂踏枯松折嘯臺音響杳不聞蕩蕩青天一明
月荒山破瓦色十步九窪疊水泉出沮洳一綫僅
不絕翁乎何意畱此居可是他山無地穴大道既
下衰日鑿聰明開玉從珪璋毀木以青黃災天和
散不畱去浪無東回咄咄此老蒼骯髒作怪魁堯
年生甲子含德如未孩標枝野鹿致足樂火食屋
居良所哀史筆亦厚誣投計識與材纏身正有一
養生安在哉

水簾記異

癸卯九月四日
同杜仲梁賦

黃華絕境探未窮道人曾約山櫻紅鏡臺懸流不
易得世俗名取香爐峰七年長路今一到刺鯁欲
滿平生胸豈知旱久泉脈絕快意一濯無絲供神
明自足還舊觀漫浪爭敢微靈通何因狡獪出變

化勝槩轉盼增清雄天孫機絲拂夜月佛界珠網
搖秋風稱奇叫絕喜欲舞恨不百繞青芙蓉銀橋
清涼巔玉鏡崧丘東世外果無物邂逅乃一逢書
生眼孔塞易破勺水已復誇神功東坡拊掌應大
笑不見螿窟鞭魚龍

洪谷聖燈

九月五日作

金門寺前山突起井底寶巖三十里舊聞聖燈在
山上紫微侍郎宜不妄山空月黑無人聲林間宿
鳥時一鳴游人燒香仰天立不覺紫煙峯頭一燈

出一燈一燈續一燈山僧失喜見未曾金繩脫串
珠散迸玉丸走杵光不定飛行起伏誰控搏華麗
清圓自殊口北荒燭龍開晦冥南極入地多異星
豈知心光毫相有真遇物外恍惚終難憑腐儒心
魄爲動蕩再拜中庭謝靈貺何曾辨作劉更生下
照乃辱青藜杖昨朝黃華瀑流神所憐今朝金門
佛燈佛作緣紛紛世議何足道盡付馬耳春風前

食榆莢

露葵滑寒羊蕨羶春榆作莢絕可憐榆令人暝何

暇計田舍年例須濃煎簫聲吹暖賣餠天人家鑽
火分青煙長鉤矮籃走童稚頃刻綠萍堆滿前炊
飯雲子白剪韭青玉圓一杯香美薦新味何必烹
龍炮鳳誇肥鮮鼠肝蟲臂萬化途神奇腐朽相推
遷夢中鸚鵡亦大樂隨意飲喙真飛仙先生捫腹
一莞然此日何功食萬錢

李峪園亭看雨

龍山右脇松十里細路蜿蜒繞龍尾松林迫塞悶
煞渠北望玉泉疑井底玉泉元自別一天眼界廓

廓無神川金城百里纔一俯半尖浮圖插蒼煙行
行下絕巘招提忽當眼未到倦不勝小憩遂忘返
玉泉一杯甘以冽未須張陸誇冰雪主人不在客
不畱烈風崖下風颼颼石頭路滑馬蹄怯山雨未
落雲先愁將軍林園永安下秋霽村墟絕蕭灑濃
雲壓屋風打頭僅得羈御脫疲馬只知龍山之神
神更神永安亦能撼詩人晦暝變化千萬態畫出
風雨元非真山靈亦愁歸厚夜半面時時見雲罅
天瓢細灑供晚涼不似草堂回俗駕層陰一掃羣

峯出一洗深青徹山骨夕陽展放紫翠屏只欠松
梢一輪月山中一石迴萬牛况是一壑復一丘不
如一詩招將入南州先生興來時臥游

游龍山

曩予魏大梁得交此州雷與劉自聞兩公誇南山
每恨南海北海風馬牛老龍面目今日始一見更
信造物工雕鏤是時山雨晴平田綠油油竝山涼
氣多况得通深幽山泉谷口出迎客石罅戛擊琳
琅球蜿蜒入微行漸覺藤蘿罨衣樹打頭惡木拉

颯棲直幹比指稠石門無風白日靜自是林響寒
颯颯一峯忽當眼仰看 不休一峯一峯千百峯
雖欲一一顧揖知無繇金城偃蹇不得上瑤壅回
合如相畱苔花萬錦石丹碧爛不收天關守虎豹
武庫開戈矛小山隨起隨偃仆獨立千仞絕頂縹
緲之飛樓百花岡頭藉草坐瀟灑正直金蓮秋亭
亭妙高臺玉斧何年修登高覽元化快如鷹脫鞵
山靈故爲作開闔巧與詩境供冥搜白雲何許來
纖絲弄輕柔蓬蓬作霧湧飄飄與煙浮玉衣仙人

鞭素蚪翁忽變化令人愁須臾視六合浩蕩不可
求初疑陶輪比運甃今悞夜壑真藏舟劫石拂未
窮杞國浪自憂斷鼇立極萬萬古爭遣起滅如浮
漚快哉萬里風一掃天四周誰言太始再開闢日
馭本自無停輶舉手謝山靈就無清涼毫相非神
羞賊子貪名山客刺已屢投黃花挂鏡臺天壇避
秦溝太山神明觀二室汗漫游胸中隱然復有此
大物便可揮斥八極隘九州玉峯有佳招絕唱須
一酬爲君探囊擲下珊瑚鈎白雲相望空悠悠異

時華表見老鶴姓字莫志元丹丘

醉中送陳季淵

寒食不數日天氣殊未佳翩翩金門客行行指龍
沙朝發忻城暮隴頭隴頭地寒無草芽拂雲堆邊
春更晚雪花茫茫揚白沙絕于山高凍煞雀榆葉
離離小藂薄愛君只欲苦死畱不道南飛何所樂
書生弓馬能幾何乃今寶投金盤隨孔璋文筆妙
天下敕勒不數陰山歌向年賦奇兩擁海駟雲筆
頭注快如懷素書布障狂笑劉義寫冰柱李汾王

鬱俱灰塵天意乃在潞陽陳舌吐萬里唾一世眼
高四海空無人殘民假息仍瘡痍誰作東山謝安
起恨我不比長桑君一月觴君上池水眼中之人
不易忘誰作冰炭置我腸衰顏明鏡兩寂寞別意
春江誰短長但願年年見顏色與君連日醉壺觴

送弋唐佐還平陽

我從商餘之山過庵羅聞君六經百家富緣摩會
最上指冠巍峩豈肯俯首春官科覃懷變生十載
後我時避兵方北走通家弋宋共有無行輩許之

爲老友晉州一書君肯來握手大笑心顏開春風
著人不覺醉快卷更須三百杯鶴骨騫飛法當壽
况是丹房藥鏡畱心久崑崙神泉浸朮芝乞與餘
膏潤衰朽天府學士登瀛洲松頂仙人巒直鈎愛
君直欲抵死畱自言世事非所求千古黃金鑛中
淚不獨盧仝并馬異蘇州韋郎交分深香山白傅
金玉音借渠兩詩寫我心相知非不多但苦心不
同同心一人去坐覺長安空離愁何從生生從情
愛中不見行路人拂袖自西東汾流滔滔兮日干

里青眼高歌吾老矣

寶豐山中有菴羅寺唐佐嘗從程內翰天益開學於此

游泰山

泰山天壤間屹如鬱蕭臺厥初造化手辦此何雄
哉天門一何高天險若可階積蘇與累塊分明見
九垓扶搖九萬里未可誣齊諧秦皇憺威靈茂陵
亦雄材翠華行不歸石壇滿蒼苔古今一俯仰感
極令人哀是時夏春交紅綠無邊涯奇探忘登頓
意愜自遲回惜無賞心人懽然盡餘杯夜宿玉女
祠崩奔湧雲雷山靈見光怪似喜詩人來鷄鳴登

日觀四望無氛霾六龍出扶桑翻動青霞堆平生
華嵩遊茲山未忘懷十年望齊魯登臨負吟鞵孤
雲拂層崖青壁落落雲間開眼前有句道不得但
覺胸次高崔嵬徂徠山頭喚李白吾欲從此觀蓬
萊

付阿耽誦

昨得商子書知有阿耽名今朝見阿耽驚喜喜復
驚迺翁雅望傾漢庭仕才千石埋九京我知渠孫
不虛生虎穴生虎子墮地骨骼成舉頭爲城尾爲

旌幾人雄猛得寧馨繡衣青春佳御史路人望見
行且止老天從旁當說似前日晦道堂前小兒子
雷動風行自應耳藜藿不采今其始

游承天鎮懸泉

詩人愛山愛徹骨十月東來犯冰雪懸流百里行
不前但覺飛湍醒毛髮間間老仙仙去久石壁姓
名苔蘚滑此翁可是六一翁四十三年如電抹并
州之山水所狀駭浪幾轟山石裂只知晉陽城西
天下稀娘子關頭更奇刷周南畱滯何敢歎投老

天教探禹穴君不見管涔汾源大車輪平泉丈八
玻璃盆不知承天此水何所本乃與沈瀆爭雄尊
平地突出隨崩犇洶如頽波射天門太初元氣未
凝結更欲何處畱胚暉素虯騰擲翠蛟舞袞袞後
出皆鱷鯤雷車怒擊冰雹散石峽峻滑蒼煙屯憑
崖下視心魄動自媿氣衰筆老勝槩過眼無絲吞
少東水簾亦瀟灑珠璣一一明朝暎陽龍暗滋瑤
草活譽石自與蓮湯溫神祠水之許儀衛盛官府
頗怪祠前碑稽考失莽魯吾聞尹革臺胎宣汾洮

障大澤自是生有自來歸有所假而自經溝瀆便
 可尸祝之祀典紛紛果何敢子胥鼓浪怒未洩精
 衛銜薪心獨苦楚臣有問天不酬肯以誕刃虛荒
 警聳瞽宇宙有此水萬古萬萬古人言主者介山
 氏且道未有介山之前復誰主山深地古自是有
 神物不假靈真誰敢侮稗官小說出閭巷社鼓村
 簫走翁媪當時大曆十才子爭遣李諶鑿陋語石
 林六月清無暑人家青紅溼窗戶射鹿有場魚有
 浦好築漕臺俯洲渚甕面柳瓢挹膏乳醉扶紅袖

別吳歌風雨不憂驚妒女

閒閒公守平定以大安庚午來遊迄今壬子四

十三年矣士俗傳介子推被焚其妹介山氏恥兄
 要君積薪自焚號曰妒女祠碑大曆中制官李諶
 所誤辭二日殊謬至有百日積薪一日燒之之語
 鄉社至今以百五日積薪而焚之謂之祭妒女云

為程孫中鄉作

繡褥錦為欄蘭湯金作盆名駒出洼水萬馬浮雲
 犇參軍愛友親弟昆御史風節海內聞諸郎楚楚
 皆玉立王謝定自超人羣高樹出大根源清流不
 渾千年雒陽陌赫赫于公門外翁老去住山村正
 要兒童侍酒尊他日新詩一千首不愁無物餉吾

孫

壽張復從道

鎮州城中金粟岡移來河東萬卷堂先生弦歌教
胄子子亦詩禮沾餘芳齒如編貝髮抹漆玉樹臨
風未二十爲渠欲作寫真詩老我慚無敬齋筆復
也美材具璞玉未雕飾良工在汝心苦卓與真積
捧檄毛義喜受杖伯瑜泣親年當喜懼寸晷真尺
璧桓榮家世傳一經何患不蒙稽古力綵服庭闈
趨繡衣霄漢立但願頤齋壽金石歲歲年年作生

日

遺山先生詩集卷第八

樂府

天門引

秦王深宮不得近從破衡成欲誰信白頭游客困
咸陽顛顛黃金百斤盡海中仙人黃鶴舉大笑人
間爭腐鼠丈夫何意作蘇秦六印才堪警兒女古
來多爲虛名老不見阿房淨如埽千年虎豹守天
門一日牛羊臥秋草

蛟龍引

古劍咸陽墓中得挾開青雲見白日蛟龍地底氣
如虹玉花千年不敢蝕洪鑪烈焰初騰精橫海已
覺無長鯨世上元無倚天手匣中誰解不平鳴割
城恨不逢相如口酒恨不逢朱虛尚方未入朱雲
請盟盤合與毛生俱誰念田文座中客只將彈鋏
歎無魚

湘夫人詠

木蘭芙蓉滿芳洲白雲飛來北渚遊千秋萬歲帝
鄉遠雲來雲去空悠悠秋風秋月沅江渡波上寒

煙引輕素九疑山高猿夜啼竹枝無聲墮殘露

湘中詠

楚山鶴鳴風雨秋楚岸猿啼送客舟江山萬古騷
人國猿鳥無情也解愁西北長安遠於日憑君休
上岳陽樓

孤劍詠

鬱鬱重鬱鬱夜半長太息吟成孤劍詠門外山鬼
泣清霜稜稜風入骨殘月耿耿燈映壁君不見一
飢縛壯士僵臥時自惜黃鵠一舉摩蒼天誰念樊

遺山詩集
二
籠束修翼

渚蓮怨

阿漢何許來素面浣風雨寂寞煙中魂依依欲誰
語

芳華怨

娃兒十八嬌可憐亭亭裊裊春風前天上仙人玉
爲骨人間畫工畫不出小小油壁車軋軋出東華
金縷盤雙帶雲裾踏鴈沙一片朝雲不成雨被風
吹去落誰家少年豈無恩澤侯金鞍繡帽亦風流

不然典取鸚鵡裘四壁相如堪白頭金谷樓臺俏
無主燕子不來花著雨只知環珮作離聲誰向琵琶
得私語無情鷓鴣瀲翡翠兒有情蜂雄蛺蝶雌勸
君滿酌金屈卮明日無花空折枝

後芳華怨

江南破鏡飛上天三五二八清光圓豈知汴梁破
來一千日寂寞菱花仍半邊白沙漫漫車輓輓鯤
鷄絃中杜鵑哭塞門顛顛人不知枉爲珠娘怨金
谷樂府初唱娃兒行彈碁局平心不平只今雄蜂

雌蜺兩不死老眼天公如有情白玉搔頭綠雲髮
玫瑰面脂透肉滑春風著人無氣力不必相思解
銷骨洛花絕品姚家黃揚州銀紅一國香千圍萬
遶看不足雨打風吹空斷腸丹砂萬年藥金印八
州督不及秦宮一生花裏活長門曉夕壽相如儘
著千金買消渴

結楊柳怨

長樂坡前一杯酒鄭重行人結楊柳可憐楊柳千
萬枝看看盡入行人手輕煙細雨綠相和惱亂春

風態度多路人愛是風流樹無奈朝攀暮折何朝
攀暮折何時了不道行人暗中老素衣今日洛陽
塵白髮明朝塞城草柳色年年歲歲青關人何事
管離情春風誰向丁寧道折斷長條莫再生

秋風怨

碧瓦高梧響疎雨坐倚薰籠時獨語守宮一著死
生休狗走鷄飛莫爲女雲間簫鼓夜厭厭禁漏誰
將海水添一春門外羊車過又見秋風拂翠簾總
把丹青怨延壽不知猶有竹枝鹽

歸舟怨

渡頭楊柳青復青
閨中少婦動離情
只從問得狂夫處
夜夜夢到洛陽城
南風吹櫓聲
北鴈鳴嚶嚶
江流望不極
相思春草生

征人怨

瀚海風煙掃易空
玉關歸路幾時東
塞垣可是秋寒早
一夜清霜滿鏡中

塞上曲

平沙細草散羊牛
幾簇征人在戍樓
忽見隴頭新

鴈過一時迴首望南州

西樓曲

游絲落絮春漫漫
西樓晚晴花作團
樓中少婦弄瑤瑟
一曲未終坐長歎
去年與郎西入關
春風浩蕩隨金鞍
今年疋馬妾東還
零落芙蓉秋水寒
并刀不剪東流水
湘竹年年露痕紫
海枯石爛兩鴛鴦
只合雙飛便雙死
重城車馬紅塵起
乾鵲無端爲誰喜
鏡中獨語人不知
欲插花枝淚如洗

後平湖曲

越女顏如花吳兒潔如玉天教竝牆居不著同被
宿美人一笑千黃金連城不博百年心樓上牆頭
無一物暮爨朝春一生足秋風拂羅裳秋水照紅
妝舉頭見郎至低頭采蓮房郎心只如菱刺短妾
意未覺藕絲長與郎期何許眼礙同舟女春波澹
澹無盡情雙星盈盈不得語十里平湖艇子遲岸
花汀草伴人歸鴛鴦驚起東西口唯有蜻蜓口翅
飛

涓川行

涓川道邊日欲西誰家少婦掩面啼漫漫長路行
不徹粉綿鏡衣手自攜自言娼家女家在梁門東
夫婿輕薄兒新人不相容憶初在家時只辦放嬌
慵爺娘惜女如惜玉近前細看面發紅無端嫁作
蕩子婦流落棄擲風埃中可憐桃李花顏色嬌蒙
茸朝看華枝好暮看華枝空安得明珠三百斛重
簾複幕圍春風

長安少年行

黃衫少年如玉筆生長侯門人不識道逢豪客問

姓名袖把金鞭側身揖臥馳行橐錦帕蒙石榴壓
漿銀作筒八月蒼鷹一片雪五華驕馬四蹄風日
暮新豐原上獵三更歌舞灞橋東

黃金行

贈王飛伯

王郎少年詩境新氣象慘澹含古春筆頭仙語復
鬼語只有溫李無他人天公著詩貧子身子曾不
知乃自神人間不買詩名用一片青衫衡霍重兒
貧女富母兩心何論同袍不同夢入門喚婦不下
機淚子垢面兒啼飢君詩只有貧女謠何曾夢見

金縷衣外家翁媪日有語嫁女書生徒爾爲昆陽
城下三更酒醉膽輪困插星斗一夕詩腸老蛟吼
十尺長人墮車走斫頭不屈三萬言欲向何門復
佞首何人壽我黃金千使君破鏡飛上天

隋故宮行

渭川楊柳先得春二月鶯啼百轉新長春宮中千
樹錦暖日晴雲思煞人君王半醉唱吳歌絳仙起
舞頰翠蛾吳兒謾說會行樂三十六宮能幾多千
秋萬古金銀闕海沒三山一毫髮繁華夢覺人不

知留得寒螿泣秋月

解劍行

古劍黑於漆鬱鬱動星文摩挲二十年今日持贈
君長鯨鼓浪三山渡知君不是泥中物袖間一卷
白猿書未分持刀買黃犢壯懷風雲鬱沉沉慚媿
漂母無千金長安侏儒飽欲死萬古不解天公心
北風浩浩吹行客隴水無聲雪花白荆卿墓頭秋
草乾擊筑行歌欲誰識君不見秦相五殺皮去時
烹鷄炊屢屢又不見敝裘蘇季子合從歸來印纍
纍丈夫墮地自有萬里氣翁忽變化安能知大冠
如箕墜吾子富貴同生亦同死

征西壯士謠

三十未有二十強手內蛇矛丈八長總爲官家金
印大不怕百死向沙場捉却賀蘭山下賊金鞍繡
帽好還鄉

墜雲謠

涉江采芙蓉芙蓉待秋風登山采蘭茗蘭茗霜早
雕美人亭亭在雲霄鬱搖行歌不可招湘絃沉沉

寫幽怨愁心歷亂如曳鬚金支翠鞋紛在眼春草
迢迢春波遠

聖婦吟

塞雲一抹平如截塞草離離臥榆葉長城窟深戰
骨寒萬古牛羊飲冤血少年錦帶佩吳鉤獨騎疋
馬覓封侯去時只道從軍樂不道關山空白頭北
風吹沙雜飛雪弓絃有聲凍欲折寒衣昨夜洛陽
來腸斷空閨搗秋月年年歲歲聖還家此日歸期
轉未涯誰與南州問消息幾時重拜李輕車

梁園春五首

車駕西遷汴
京後作

軍從南去三迴勝雪自冬來二尺強今歲長春多

樂事內家應舉萬年觴

長春德陵
誕節名

暖入金溝細浪添津橋楊柳綠纖纖賣花聲動天
街遠幾處春風揭繡簾

上苑春濃晝景閒綠雲紅雪擁三山宮牆不隔東
風斷偷送天香到世間

樓觀沉沉細雨中出牆花木亂青紅朱門不解藏
春色燕宿鶯喧處處通

雙鳳簫聲隔綵霞宮鶯催賞玉谿花誰憐麗澤門

邊柳瘦倚東風望翠華

龍德宮有玉谿館
麗澤燕都西門名

探花詞五首

禁裏蒼龍啟九關殿前鸚鵡喚新班沉沉綠樹鞭

聲遠嫋嫋薰風扇影閒

浩蕩春風入繡鞍可憐東野一生寒皇州花好無

人管不用新郎走馬看

六十人中數少年風流誰占探花筵阿欽正使才

情盡猶欠張郎白玉鞭

李欽用二十七張夢
祥少一歲又未婚云

美酒清歌結勝游紅衣先為渚蓮愁曲江共說櫻

桃宴不見西園風露秋

人物風流見藹然逼人佳筆已翩翩龍津春色年

年在莫著新銜惱必先

獵城南

翩翩游俠兒白馬如疋練朝出城南獵暮赴軍中

宴北平有真虎愛憎腰間箭

春風來

春風來時瑤草芳綠池珠樹宿鴛鴦春風去後瑤

草歇來鴻去燕遙相望鴛鴦不得雙燕鴻天一方
娟娟愁眉色靜與遙山長錦衾復羅薦夢語相息
怨月明烏夜啼空閨淚如霰

幽蘭

僊人來從舜九疑辛夷爲車桂作旂疏麻導前杜
若隨披猖芙蓉散江籬南山之陽草木腓澗岡重
複人迹希蒼崖出泉懸素霓翛然獨立風吹衣問
何爲來有所期歲云暮矣胡不歸鈞天帝居清且
夷瑤林玉樹生光輝自棄中野誰當知霰雪慘慘

清入肌寸根如山不可移雙麋不返夷叔飢飲芳
食菲尚庶幾西山高高空蕨薇露繁無人薦湘纍
山鬼切切雲間悲空山月出夜景微時有彩鳳來
雙棲

并州少年行

北風動地起天際浮雲多登高一長嘯六龍忽蹉
跎我欲橫江鬪蛟鼉萬弩迸射陽侯波或當大獵
燕趙間黃熊朱豹皆遮羅男兒萬馬隨撝訶朝發
細柳暮朝那埽雲黑山布陽和歸來明堂見天子

黃金橫帶冠峩峩人生只作張騫傅介子遠勝僵
死空山阿君不見并州少年夜枕戈破屋耿耿天
垂河欲眠不眠淚滂沱著鞭忽記劉越石拔劍起
舞鷄鳴歌東方未明兮奈夜何

怒虎行

答宋文之

怒虎當道臥百里不敢嚙紛紛射虎手一見弧矢
墮誰知世有李將軍霹靂弦聲驚石破昨日雙南
金今日綠綺琴贈君無別物唯有百年心

梅華

太歲梅華晚今歲梅華早和羹要佳實春風莫草
草

寶鏡

寶鏡挂秋水青娥紅粉妝春風不相識白地斷肝
腸

續小娘歌十首

吳兒沿路唱歌行十五五和歌聲唱得小娘相
見曲不解離鄉去國情

北來游騎日紛紛斷岸長堤是陣雲萬落千邨藉

不得城池留著護官軍

山無洞穴水無船單騎駟人動數千直使今年留
得在更教何處過明年

青山高處望南州漫漫江水遶城流願得一身隨
水去直到海底不迴頭

風沙昨日又今朝踏碎鷓鴣頭路更遙不似南橋騎
馬口生紅七尺繫郎腰

鴈鴈相送過河來人歌人哭鴈聲哀鴈到秋來却
南去南人北渡幾時迴

竹溪梅塢靜無塵二月江南煙雨春傷心此日河
平路千里荆榛不見人

太平婚嫁不離鄉楚楚兒郎小小娘三百年來涵
養出却將沙漠換牛羊

飢烏坐守草間人青布猶存舊領巾六月南風一
萬里若爲白骨便成塵

黃河千里扼兵衝虞虢分明在眼中爲向淮西諸
將道不須誇說蔡州功

遺山先生詩集卷第九

五言律詩

懷益之兄

世故伊川歎鄉情越客音天宜他日定陸已向來
沉冉冉愁看老源源事益侵誰言易排遣自分不
勝任鞭影驚疲馬鐘聲急算禽跼中無曠迹喧外
有幽尋夢失名家筆書存遺子金山田和石瘦茅
屋過雲深春雨蔬成圃秋霜柿滿林樹陰涼拂席
花氣澹盈襟宿鷺窺晨汲孤猿伴暝吟溪僧時問

字野客或知琴抱璞休奇售臨觴得緩斟阿兄團
聚日曾語百年心

汴禪師自斲普照石爲研以詩見餉爲和二首
寺廢瓦不毀研奇功亦多已知良斲少更奈苦心
何挺挺剛無敵津津潤可呵羽陽陵谷變冰井字
書訛贈比黃金璞辭慙潔石歌遙知玉音在洗耳

俟研磨

長吉有紫石研歌

點化鉛仍見堅凝鐵易穿何年埋朽壤此日睹青
天古色秋煙重哀音夜雨懸有刀堪切玉是鏡不

名塲佛廕淪空劫書林結後緣禪河一勺水更擬
就師傳

惡雨

惡雨惡復惡龍公何遽然霆轟冰塔碎電掣玉繩
連高岸皆深谷層霄一漏泉黑來疑擁海白散忽
成煙市響千門合潮頭萬弩穿天瓢休盡建上枯聲
早有他年

癸巳除夜

鼎定周元重新安漢已然不隨南渡馬虛泛北歸

船身並枯蝸化心爭脫兔先塵埃嗟落泊光景強
畱連往事青燈裏浮生白髮前更殘鐘未動猶屬
出京年

病中

病因食猪動氣而作癸卯
四月二十一日晨起書

戰勝頗自恃寧知從外腴文章工作祟時運迫摧
枯止酒嗟何及燒猪本不圖膏粱無急變山澤有
真臞詩信藤條戲方遭鐵彈誣鹽去聲紅忘後顧驚
黑見前驅眩入投床仆晨淹伏枕呼萬錢誰嘔泄
一嚮爾乘除靜伏心仍悸深調息亦羸跼嫌囚宇

宙渴憶捲江湖風柳留蟬蛻霜松映鶴孤養和懲

往失

凡名養和事
見天隨子詩

扶老念時須杯杓歸神誓垣墻
任佛踰回蹊且垂翅望或在桑榆

綦威卿毅挽辭

東海于門舊桐鄉邑墓遷

綦東海人威卿之祖待
制公知忻州因家焉

芝蘭宜有種珠玉自成淵慈母依隣切名郎獲譽
先豪華非日損信厚出天然詣理言猶訥持心靜
益專笑談千里到咳唾百金捐論齒推予長垂髫
得子賢通家仍孔李知已與王田刻責誰斯切推

扶最所偏孤嫠平日託昆季再生緣摧割詩寧寫
精微夢或傳都將百年淚一慟夜臺前

贈祖唐臣

詩道壞復壞知言能幾人陵夷隨世變巧僞失天
真鬼蜮姦無盡優伶伎畢陳謗傷應背裂淫褻亦
肌淪珉玉何曾辨風花祗自新憐君用幽意老矣
欲誰親

老樹

老樹高留葉寒藤細作花沙平時泊鴈野迥已攢

鴉旅食秋看盡行吟日又斜干戈正飄忽不用苦
思家

陽翟道中

長路伶俜裏羈懷蒼莽中千山分晚照萬籟入秋
風頻見參旗縮虛傳朔幕空故園歸未得細問北
來鴻

月觀追和鄧州相公席上韻

月觀知名舊池亭發興偏露涼驚夜鶴風細咽秋
蟬綠泛兵厨酒紅依幕府蓮無緣逐清景空羨飲

中仙

太室同希顏賦

壯矣崧維岳盤盤上窈冥中天瞻巨鎮元氣有遺
形雨入秦川黑雲開楚岫青鰲掀一柱在萬古壓
坤靈

送登封張令西上

罷縣人稱屈悠悠復此行渭城秋鴈到秦嶺暮雲
平道路衣從典風塵劔已鳴山西多俠客莫說是
書生

方城道中懷山中幽居

技拙違時用年饑與食謀江山貧士嘆日月賈胡
畱楚客頻招隱文園故倦游衡門有幽事還我北
窗秋

孟州夾灘飲承之御史家

同欽叔作

黃酒禁愁得芳梅發興饒紛紜聊且置魄磊故須
澆鷄黍成前約干戈有此宵平生楊大理惜不預

佳招

雲卿赴召五日矣

送曹吉甫兼及通甫

意氣羨君豪，憐君屈騎曹。安能事筆硯，且復混弓刀。
風雪貂裘暗，關山馬骨高。南飛見鴻鴈，應爲惜哀勞。

勝槩

三鄉作

勝槩煙塵外，新詩杖履間。偶隨流水去，澹與暮雲還。
吾道三緘口，時情一解顏。從今便高臥，已負半生閒。

少室南原

地僻人煙斷，山深鳥語譁。清溪鳴石齒，暖日長藤

芽綠映高低。樹紅迷遠近，花林間見鷄犬。直疑是仙家。

寄贈龐漢茂弘

之子貧居久，詩文日有功。苦心唯我見，高誼許誰同。
萬里虎食肉，一鳴鷄長雄。皇天老眼在，且莫怨丘中。

洛陽古城曦陽門早出

乘月出曦陽，黎明轉北岡。荒村自鷄犬，長路足豺狼。
天地憐飄泊，風霜憶閉藏。微吟許行役，淒斷不

成章

聞希顏得英府記室

近得髯參信知從兔苑游
文星映朱邸勝槩減黃樓
進退存中道功名接上流
徒懷貢公喜塵土隔瀛洲

瀛洲

落魄

落魄宜多病艱危更百憂
雨聲孤館夜草色故園秋
行役魚鱗尾歸期鳥白頭
中州遂南北殘息付悠悠

得姪傳信二首

今日鄜州姪知從虎穴還
百年陰德在幾日鬢毛斑
隔澗家仍遠羈棲食更艱
誰憐西北夢依舊遶秦關

號驛傳家信坤牛玩吉占
團圓知有望悲喜亦相兼
過眼書重展伸眉酒屢添
關河動高興百遶望清蟾

阿千始生

四十舉兒子提孩聊自誇
夢驚松出笋兆應竹生

花田不求千畝書先備五車野夫詩有學他日看
傳家

長壽新居三首

同仲
經賦

地古村墟迥川迴縣郭斜蒲池餘老節菊水引新
芽卜築欣成趣歸耕覺有涯迎門顧兒女今日是
山家

隱去心初在親朋復此偕荒田歸別業高樹表新
齋泉石深三逕風塵限兩崖青山坐終日無物寄
幽懷

昔有姜夫子來家寂寞濱墓田耕已熟碑石字猶

新詩酒娛中歲山林有外臣三生可信否吾亦寄

前身

宣和中姜夢得處士常隱于此墓碣在焉夢
得曾上書仁宗既老以詩酒自娛碣文說地

名白鹿原
長壽村也

少林雨中

西堂三日雨氣節變蕭森偃臥復欹臥長吟時短
吟鐘魚四山靜松竹一燈深重羨禪棲客都無塵
慮侵

十二月六日二首

俛鬼跳梁久群雄結構牢天機不可料世網若爲
逃白骨丁男盡黃金甲第高閭門隔九虎休續楚
臣騷

海內兵猶滿天涯歲又新龍移失魚鼈日食闔麒
麟草棘荒山雪煙花故國春聊城今夜月愁絕未
歸人

得一飛姪安信

音問他鄉隔存亾此日知夢中憂凍餒意外脫艱
危避地何嗟及還家敢恨遲衰年吾事了似有鹿

門期

短日

短日碓聲急重雲鴈影深風霜侵晚節天地入歸
心零落溝中斷酸嘶爨下音五年朝與夕清血幾
霑襟

送母受益自潞府歸崧山

薄俗科名賤孤生志願違正須謀獨往何暇計群
飛泌水真堪樂荊州况可依青山吾舊隱此日羨
君歸

寄程孫鐵安

御史陰功在孫兒玉不如已能騎竹馬想亦愛銀
魚異縣關山濶衡門骨肉疎幾時隨阿舅盡讀外
家書

贈汴禪師

道重疑高譽禪枯耐寂寥蓋頭茅一把饒腹篋三
條趙子曾相問憑公每見招風波門外客無事且
相饒

乙亥元日

五十未全老衰容新又新漸稀頭上髮別換鏡中
人野史纔張本山堂未買隣不成騎瘦馬還更入
紅塵

送楊次公兼簡秦彥容李天成

海國山如染雲堆草易荒時危頻虎穴路絕更羊
腸弔影雙蓬髮攜家一藥囊殷勤秦與李無惜借
餘光

發濟源

早嘆今年劇他鄉底處歸羸糧失先具涉世本無

遺山詩集 十
機棄擲烏皮几裴回白版扉殷勤雙語燕媿汝遠
相依

倪庄中秋 巳亥

強飯日逾瘦袂衣秋已寒兒童漫相憶行路豈知
難露氣入茅屋溪聲喧石灘山中夜來月到曉不
曾看

荅潞人李唐佐贈詩

聞道嗟予晚求師愧子賢泥途終自拔璞玉豈虛
捐書破三千牘詩論二百年文章有聖處止脉要

人傳

陽興砦

亂石通樵逕重崗擁戍城山川帶淳朴鷄犬見升
平雨爛沙仍軟秋偏氣自清年年避營馬幾向此

中行

絲州入府避騎兵
奪馬者多繇此路

懷粹中

醉解不復寐吟君田舍詩從知石門老未比木菴
師日月淹書尺江山入鬢絲何因重談笑却似少
林時

同周師夢卿崔振之遊七岩

定襄

客路頻年別僧居半日閒同遊盡親舊舉目是家
山世事風塵外詩情水石間悠然一尊酒落景未
知還

送崔振之迎家汴梁

老伴不易得殘年唯有閒桑麻一村落鷄犬兩柴
關樊守能供酒周侯許買山從今釣溪上日日望
君還

聚仙臺夜飲

永夜畱歡席高懷遠市塵月涼衣有露風細酒生
鱗鄉社情親舊仙臺姓字新殷勤詩卷在長記坐
中人

續陽平十愛

我愛陽平酒兵厨釀法新百金難著價一錢卽醺
人色笑榴花重香兼竹葉醇爲君畱故事喚作杏

園春

杏園指鈕子
正家園爲言

送田益之從周帥西上二首

市近厨無肉書香橐有蟲深居誰不樂

去聲

兀坐竟

何功天日伸眉後江山洗眼中蓬萊如可到剩借

玉川風有所謂

一室盆歌後供樵只短僮求風可無日牧犢未成

翁桂樹春風近楊萸煖律通明年孟德耀應與伯

鸞東

九月晦日王村道中

水涸沙仍溼霜餘草更幽煙光藏落景山骨露清

秋坐食知何益行吟只自愁隨陽見鴻鴈三嘆惜

淹留

十月四日往關南二首

短日晨光澹高風宿靄澄山寒渾欲雪水涸劣能

冰振厲時何有躋攀倦不勝哦詩聊自遣松液已

香凝子方釀松醪當以今日燕故及之

行路見新月獨行還獨謠勞生塵袞袞晚色鬢蕭

蕭野曠無遺穗林疎有墮樵回頭麥山嶺更覺馬

蹄遙

寄王文德新二首德新時在汝州

沙際春還去雲頭雨不成興來誰共醉事往獨含

情紫邏留行客黃流隔戍城岸花何處在空憶權

歌聲

孟津時事

清汝風華地平生記此游酒能千日醉春必萬金

酬攬鏡非遲算逢花儘滯留只應歌笑處偏欠李

鄜州

欽叔時赴鄜州幕官

舊國

舊國分崩久孤兒展省初客衣留手綫驛傳失肩

輿夢拜悲兼喜心飛疾亦徐殷勤南去鴈先為到

商於

和仲梁

林影兼秋薄雲陰帶晚涼石潭魚近藻沙渚鴈留

一作舍

霜笑語無長路登臨豈異鄉一尊堪共醉惜

不是重陽

甲辰夏五月積雨十餘日不止遣悶二首

甲子霖霖雨巡簷悶不禁幻泡成實相水樂激哀

音輝海聞天漏堯年見陸沉騫飛想雲表癡坐若

為心

南史王景文傳人居貴要但問心若為耳

甲子霖霖雨農郊搏手空排墻寧有禮為怪竟何

功戰蟻侯王上鳴蛙意氣中掃晴應曉夕少忍待

秋風

排墻事見王衍論云
排墻之壓猶有爲耳

陽泉棲雲道院

方外復方外翛然心迹清開窗納山影推枕得溪
聲川路遠誰到石田平可耕霜林不嫌客畱看錦
崢嶸

劉子中夢菴

寤寐生與死幻歟爲是真如何夢中境不屬覺時
人朝徹從渠夜形開亦此神殷勤花上蝶分我漆

園春

丙午九日詠菊二首

秋菊有何好祗緣風露清花中誰比數霜後獨鮮
明九日惜虛過一尊還自傾今年病居士吟遶更
關情

几案得新供小窓幽更宜風霜寧小怯根撥要深
移黃素金行正芳甘藥品奇三薰復三沐歲晏與
君期

感事

壯事本無取老謀何所成人皆傳已死吾亦厭餘
生潦倒封侯骨淹畱混俗情百年堪一笑辛苦惜
虛名

酬中條李隱君邦彥

川路限南北相逢今白頭蟲沙非故國人物自名

流學道慙高步留詩惜暗投歸秦如有便終伴竹

林游

邦彥自關中徒步省其季父於集寧故有竹林之句

送邦彥北行

比數推前輩陪從結後緣川涂卽睽隔詩酒重畱

連白鶴歸華表青牛得老僊秦山好行脚倚杖待

明年

紫微劉丈雅有游秦之興故篇中有及

同冀文明秀山行

算景披禎幅山間二老同雲如愁戍苦雪亦笑詩

窮古木凍欲折斲崖行復通從今胡谷夢時到水

聲中

同姚公茂徐溝道中聯句

路轉川途濶天低雨氣昏綿山連漢壘汾水入并

門姚

來往頻鞍馬登臨負酒尊聯詩強一笑妻絕

恐消魂

壬子月夕

明月復明月今年還遠遊關河動歸興時節重離
憂老眼耿無寐病身偏覺秋遙憐小兒女把酒望
東州

庚子三月十日作

殘夢志書帙餘寒滯酒杯青銅元懶照白紵更寬
裁水際時獨往花邊知幾迴殷勤雙語燕應自謝
家來

七月十六日送馮揚善提領關中三教

爲愛秦中好西遊日苦遲青雲動高興白首得新
知道在貧何病官閒老更宜相思詩酒社無計與
追隨

京兆漕司官居三首

符節推通貴江山入勝游名園隨地改高棟與雲
浮簿領歸閒暇鶯花接獻酬不知秋夜月何似庾
公樓

複嶺雲橫野孤峰玉柱天遙知開館日別破見山

錢夢出紛華外詩來寂寞邊亭中誰舉酒高興想
悠然

聞說梅軒好長吟有所息入簷看瘦影挂月見橫
枝東閣今千載風流彼一時西遊曾有約到日更
題詩

甲寅正月二十三日故關道中三首

雪礪不得過陽陂如見畱林煙常暗澹木葉自颯
颯齒髮悲行役鶯花惜舊游塵埃與風雨看待幾

時休

千里不易到三冬須少畱居情猶晉產去意已雕
丘遠出每爲苦雄誇還自羞君心未肯在應待肯
時休

六十復半十年年添白頭祇知詩遣興未覺酒忘
憂人七因循過元宵塊坐休殷勤行記上今日是
東州

送閻子實焦和之北上

秦府賢初聚瀛洲路匪遙謨謀在廊廟物色到漁
樵布褐豈終隱旌車行見招春風兩黃鵠老眼看

雲霄

庫城

浩浩庫城水岸高知幾尋疎林護懸險絕壁入清
深跼步無曠迹勞歌惟苦音年年一來此老我亦
何心

婁生北上

并府虛荒久大城如廢村草茅知世故泉壤隔天
闈六月甘霖浹一言陰理存明年佩符節知有奉
春孫

遣興

几案滿書史欣然忘百憂一篇詩遣興三醖酒扶
頭千載陶元亮平生馬少游但留強健在老矣復
何求

八月并州鴈

三鄉
時作

八月并州鴈清汾照旅群一聲驚晚笛數點入秋
雲滅沒樓中見哀勞枕畔聞南來還北去無計得
隨君

示白誠甫

之子吟爆竹迺翁欣樹萱崑山多美玉江水發初
源名教有樂地詩書皆雅言通家吾未老倚杖望
高軒

甲寅十二月四日出鎮陽寄宰魯伯

滹水曉光動霸橋詩境同衝寒騎瘦馬認影識衰
公長路風聲裏孤城雪意中回頭歌笑處淒絕意
何窮

送文生西行

今夜東山月隨人知幾程從軍少年事分手故鄉

情渭水風露早秦川煙樹平相招有仙掌無計與
君行

乙卯十一月往鎮州

村靜鳥聲樂山低鴈影遙野陰時混朗冷雨只飄
蕭涉遠心先倦衝寒酒易消紅塵望南北渺渺見
長橋

挽趙參謀二首

以下係續編

偃息參戎幕敦龐一褐寬儒宮新俎豆賓榻老衣
冠石動心寧轉河清笑自難殷勤題画像畱與後

生看

一云留作
典刑看

篇什中州選兵間僅補完風人定誰采墨本賴君
刊雅道湮沉易幽光發越難高門有孫息玉立看
儒冠

嗣侯大總管哀挽二首

北俗資財勁將軍迥不群賓筵推雅量戰艦望奇
勳運隔黃圖日神馳紫塞雲祇應吳季子拊樹惜
徐君

倚伏難前料乘除忌蚤成老親如宿昔世爵見哀

榮劔鬱雙龍氣碑留九虎名感歌凡幾解千載賁
佳城

荅弋唐佐

魯山人有
志道學

遭亂無安地分憂得若人鄉隣存世譜骨肉到情
親信默餘天粹咀嚙有道真懷哉沂水上同詠舞
雩春

不寐

不寐復不寐悲吟如自讐鷄棲因失曉虫語苦爭
秋日月虛行橐風霜入敝裘誰憐庾開府直欲賦

澆愁

送楊叔能東之相下

海內楊司戶聲名三十秋
 文高徒自苦食盡與誰
 謀老檜風霜飽芳蘭澗壑幽
 東游無可慮敬客有
 蕭侯



遺山先生詩集卷第九

終



